



**ANOGUSI**

Mae'a Galuega Toe Fa'aleleia o Auala i Kanana Fou	1
Osi Feagaiga EFKAS Lupe o le Fa'aolataga ma Vaimoso & Lilly Pasia FS	1
LAUGA - Tony Hollister FT	2
Toe Fa'afou Fale Mautotogi a le Ekalesia i Fagalele	5
Fonotaga a le <i>Oceania Biblical Studies Association (OBSA)</i> i Kanana Fou	5
Fa'afiafia le EFKAS i le Sisiga Fu'a 123 Tausaga a le Malo o Amerika Samoa	6
'Aufaigaluega Agavaa mo le Galuega Tausi 'Aulotu	7

**Mae'a Galuega Toe Fa'aleleia o Auala i Kanana Fou**



Ua tele upu i manū auā o lea ua tū le ala ma le mila sa fitā i ai le EFKAS. O le aso 21 o Mati, 2023, na fa'apaiaina ai e le Ekalesia nisi o ana galuega sa fa'atino e lana Komiti o Feau Eseese, aemaise le galuega o le toe fa'aleleia ma le fa'atāina o le auala i totonu o le laumua i Kanana Fou. O le kamupani o *McConnell Dowell* sa feagai ma lenei galuega. O le tau atoa o le galuega e \$963,733.57. O le vaega tele o le seleni sa fa'atupe ai le galuega, o le talosaga sa tuuina atu i le Malo o Amerika Samoa i alaga tupe o le

*American Rescue Plan Act (ARPA)*, i lalo o le Ofisa o A'oga, na fa'amatuu mai ai le \$712,722.57. Ae totogi e le Ekalesia le \$251,001.00 e fa'amae'a ai.

To'atele fa'auluuluga a le Malo sa valaaulia mo le fa'apaiaina o le auala, e aofia ai le Afioga i le Kovana Sili, Lemanu Peleti Mauga; le Afioga i le Peresetene o le Senate, le tofa ia Tualo M. Fruean; le Afioga i le Fofoga Fetalai, le tofa ia Savali T. Ale; le Afioga i le Fa'amasino Sili, Michael Kruse; fa'apea nisi o Fa'atonu o Matagaluega sa fesoasoani i le galuega, e aofia ai le Fa'atonu o Tupe a le Malo, le tofa i le tootoo ia Malemo Tausaga (TT); Fa'atonu o A'oga, le tofa ia Talauega Dr. Samasoni Asaeli; ma le Fa'atonu o Galuega Lautele, Sina Voight. Sa valaaulia ai foi le Komiti a le 'Au Toeaina e molimauina le fa'amoemoe, lea na malaga mai ai le Ta'ita'ifono o le 'Au Toeaina mai Hawaii, le Susuga ia Falelua Lafitaga FT.

O le Susuga i le Peresetene, Dr. Moreli Niutoa FS, sa ta'ita'iina le sauniga mo le fa'apaiaina o le auala, ae saunia e le Kolisi pese ma viiga. O Tala o le Galuega na saunoa i ai le Failautusi Aoao o le Ekalesia, Nafatali Falealii FS. Na saunoa fa'apitoa le Afioga i le Kovana Sili e fa'afetaia le Ekalesia i lona lagolagosua o....



**Osi Feagaiga EFKAS Lupe o le Fa'aolataga ma Vaimoso & Lilly Pasia FS**

O Mati 25, 2023, na fa'ataunuu ai le fa'amoemoe o Osi Feagaiga a le ekalesia EFKAS Lupe o le Fa'aolataga (*Pulega Alaska i Matu, Matagaluega a Alasaka*) ma le faifeau filifilia, **Vaimoso Pasia FS ma le faletua ia Lillyantelynn**. Na muamua feiloai aiga ma le Ekalesia i le Aso Faraile, Mati 24, 2023. Na amata le feiloaiga i le sauniga na ta'ita'i e le Susuga i le Faifeau Toeaina malolo ia Eneli Kalifa. O le afioga ia .....

*Fa'aauau i le itulau 4*

*Fa'aauau i le itulau 2*

Fa'aaauu mai le itulau 1

**Galuega Toe Fa'aleleia o Auala i Kanana Fou**

....le faigamalo i ana fuafuaga fai, aemaise le fa'aavaanoaina o le malumalu "Ua Taunuu" ma le fale taalo Taeaoafua o Tupulaga mo le fa'aaogaina e le Malo i taimi uma e talosaga mai ai. Na fa'afetai foi le Kovana Sili i le Ekalesia ona o le galuega o le 'auala, aemaise le finagalo o le Ekalesia i le ofoina mai o le 'auala e fai ma auala e sulufa'i mai ai le atunuu i totonu o le Lau-mua i taimi o fa'alavelave fa'ale-natura ma fa'alavelave fa'afuase'i, e pei o taimi e fa'amata'u mai ai se galu lolo fa'apea ma fa'ama'i e pei o le koviti.

O le Afioga i le Ta'ita'ifono o le Fonotele, le Susuga i le Toeaina ia Leatulagi Fa'alevao, na saunoa e tali fuaitau ai i le saunoaga a le Afioga o le Kovana Sili. Saunoa le Afioga i le Ta'ita'ifono e fa'ailo le agaga fa'afetai i le Kovana Sili ma le Malo mo le fesoasoani tele sa auina mai mo le fa'atupeina o le galuega i le 'auala. Na fa'afetai foi le Ta'ita'ifono i le mamalu o le 'au valaaaulia sa mafai ona 'auai, e aofia ai ma le 'Au Toeaina, fa'apea le Peresetene ma le Kolisi i Kanana Fou. Na fa'apitoa le agaga fa'afetai i le Komiti o Feau Eseese ma galuega e tele sa mafai ona fa'atinoina. O le faletua o le Afioga i le Ta'ita'ifono, Vagai Fa'alevao FFT, sa feagai ma le ootiina o le lipine o le galuega. Ina ua mae'a le saunoga a le Afioga i le Ta'ita'ifono, ona faia lea o le taumafataga ma fa'aaloaloga na tapena e le Komiti o Feau Eseese mo le 'au valaaaulia.

O isi galuega ua mae'a ona fa'atino sa fa'ailogaina i lea aso, e aofia ai: le toe fa'aleleia o tauluga o le malumalu 'Ua Taunuu' (\$56,881.00), o le suia o Pa o le 'aai (\$36,000.00), ma le fa'atuina o Saini fa'ailo fou i totonu o le 'aai (\$51,998.00). Na fai meaalofoa mai foi le kamupani o le McConnell Dowell i le Ekalesia i le fa'amamaina ma le valiina o apa o le malumalu 'Ua Taunuu' (\$33,000.00). O galuega uma ia sa fa'atupe e le Ekalesia. A tu'u fa'atasi ma le seleni na alu i le auala, e \$395,880.00 le aofa'i o le tupe a le Ekalesia na alu i galuega uma ia. A o le tau atoa lava o galuega uma ia sa fai, e \$1,141,602.57.

E fia fa'amau le agaga fa'afetai a le Komiti o Feau Eseese ia i latou uma sa fesoasoani i lenei galuega. Fa'afetai i le McConnell Dowell ma le galuega tele i le 'auala. Fa'afetai i le Jay's Construction sa feagai ma le galuega i le malumalu 'Ua Taunuu'. Fa'afetai i le All-Star Signs mo saini ma fa'ailo matagofie ua tapena mo le 'aai. Fa'afetai i le kamupani o le K&K mo Pa o le 'aai. Fa'apitoa le fa'afetai i le Susuga i le Faifeau Fai-aoga, le foma'i ia Elekosi Lafitaga, mo le fesoasoani i le Komiti. Fa'amanuia tele le Atua ona o taleni ma meaalofoa ua foaiina, e auauna ai mo lona fingalo.

**LAUGA**Saunia: **Tony Hollister FT****Tusi Faitau:** Kenese 33:1-11; Ioane 15:12-17**Matua:** Ken.33:4 "Ona momo'e mai lea o Esau e fa'afetaia'i mai ia te ia, ua fusi ia te ia, ma punou i lona ua, ma feāsogi ma ia; ona lā fetāgisi ai lea."**Autu: "O so'otaga fa'auso e tau i le avea ai ma uo"****1. Tāua o so'otaga fa'auso** (*The necessity for brotherly/sisterly relations*):

O le tasi o vaega tāua i le i ai o le tagata i le lalolagi, o so'otaga fa'auso [*living with others as brothers and sisters*]. O so'otaga, e lē fa'apito ai le soso'o atu, i le lanu, gagana, ma tulaga fa'alētagata, i li'o eseese o le ola. O le fananau mai fo'i o tagata i aiga, ua fai ai le so'otaga fa'auso, ma vaega tāua o aiga i le finagalo fofoa o le Atua. O le "uso" i le li'o fa'aSamoa, e aofia ai so'otaga e lua: o le ali'i i le ali'i fa'apea le tama'ita'i i le tama'ita'i. E fa'apena i so'otaga fa'aatun'u i Sasa'e-tu-totonu. O uso e tele ina aofia fa'atasi ai ali'i ma tama'itai (i le fa'aaoga ai o le numeratele o le nau-na uso). E foliga fa'apea fo'i le uiga o le upu, "uso", i le fa'aaoga ai e Iesu; e aofia fa'atasi ai ali'i ma tama'ita'i.

**2. O le fai ai o le so'otaga fa'auso ma fa'ailoga o le so'otaga fa'aleagaga** (*The brotherly/sisterly relation as symbols of spiritual relations*):

O le ata la o le so'otaga fa'auso i aiga, ua fai ma fa'afanua po'o fua, [*a blueprint of communal relation*]; o so'otaga fa'aalia ai le finagalo o le Atua. O tagata e lē tū fa'amauga ae soso'o i lona talia ai o le isi tagata, e pei ona iloa ma alofagia tagata uma e le Atua. O le so'otaga fa'auso lea, e fa'asino i ai le vaega e lua o le Tulafono fa'aTeuterenome le sa ta'ita'iina ai le ola o le nu'u o Isaraelu "Ia alofa atu i le lua te tuā'oi ia pei o oe lava ia te oe". O le uiga lea o le upu "uso", e fa'asino i ai fo'i le vaega e lua o le fuaitau fa'aSamoa, "O uso mo aso uma, a o uso mo asovale" [*friends for every day, but brothers/sisters in bad days*]. O lona uiga, e pei o asovale e fa'atoā maua ai le atoa o le avea ma uso. O asovale fo'i e i ai taimi e ta'ita'iina ese ai le ola mai ala o le Atua, ae maise pe a pulea le ola e lē malie fa'aletagata. O le malie fa'aletino lea i le soso'o atu fa'auso, na foliga autu ai le fia fa'alelei atu, o Iakopo iā Esau lona uso i le tala a le Kenese; auā o le uso na fāoa fa'amanuia e tatau mo Esau le uso matua.

Fa'aaauu i le itulau 3

### 3. Malaga toe fo'i a Iakopo e fa'alelei ma lona uso (*Jacob's return to mend the relation with his brother*):

Na tapena le malaga fa'alelei a Iakopo i lona uso o Esau, i mea silisili mo le fa'amalie ai o Esau i le tino; o lafu manu ma oloa, fa'atasi ma avā ma fanau a Iakopo. A o le tapenaga fo'i na ta'ele ai le agaga o le Atua mo leleiga fa'aleagaga. Na fa'aosofia ai Iakopo e fa'ailoa lona to'ilalo, e tusa o lana mea leaga na fa ii lona uso, e pei ona ta'ua i luga; ma saili ai mo le fa'amagaloga mai ia Esau. A o lana sa'iliga fo'i lea mo lona fa'amagaloga mai le Atua, auā o lana mea leaga na fai i lona uso, o le leaga fo'i lea ua fai i le Atua. Na fai ane ai le (f. 3e), "Ua fa'afitu ona ifo toele, ua o'o ina latalata atu i lona uso" [*bowed down to the ground seven times*]. O le ifo to'ele fa'atasi ma lona aiga mo se amataga fou i le so'otaga ma le Atua e ala i le talia ai e Esau lona uso. O le numera 7 fa'amatala ai le ifoga, o le fa'ailoga o mea atoatoa i le aganu'u fa'aEperu. Ua fa'aalia ai i le ifo fa'afitu, le atoatoa o le fa'amaulaloga. Ua lē na o se aga e fai ia Esau, a'o le ifoga i le Atua e ala i le uso. O le tali leleia fo'i o Iakopo e Esau, o lona tali leleia fo'i lea e le Atua. O uso e pei o le fuaitau a le atunu'u, "E ta'aalo a tama a'o le uso" [*They are brothers through thick and thin*].

O le usoga na fa'aalia i le tali ane a Esau, e pei o upu (f.4 matua), "Ona momo'e mai lea o Esau e fa'afe-taia'i mai ia te ia, ua fusi ia te ia ma punou i lona ua, ma feāsogi ma ia; ona lā fetāgisi ai lea". O veape fa'amatala ai le tali leleia, o le "momo'e, fusi, punou i lona ua, feāsogi, ma fetāgisi" [*ran, embraced, threw his arms around his neck, and kissed him*]. O fa'ailoga o le agaga tatala o Esau e talia Iakopo. Ua fai ai Esau ma uso ua fa'aalia ai le agaga tali leleia fa'aleAtua, mo tagata agasala ua salamo. A o le uiga lea o le Atua tali mai i le tagata salamo, e pei ona fa'ailoa i le tala a Luka (m. 15), e fa'asino i le ui'i fa'amaumau oa, ina ua toe fo'i i le aiga a'o fa'atali mai lona tamā. Fai mai Luka (f. 20), "Ua iloa mamao atu fo'i o ia e lona tamā, ona mutimuti vale lea o lona alofa". O le va'aiga fa'atamā alofa o le Atua, na fa'aalia fo'i i le talia lelei e Esau o lona uso.

A o lea tali leleia e le Atua o le tagata ua salamo, e le autū i mea o le tino. Na le talia ai e Esau meaalofa a Iakopo. Peita'i, na tali ane ai Iakopo (f. 10), ina ua manatu Esau e toe fa'afō'i meaalofa mai ia Iakopo, "Afa'i lava e te alofa mai ia te a'u, ia e talia mai lava la'u meaalofa; auā o lenei ua ou iloa atu lava ou fofoga, ua peisea'i ua ou iloa atu fofoga o le Atua, ma ua e finagalo malie mai ia te a'u". O meaalofa la a Iakopo mo Esau, o le taulaga mo le Atua. Auā o le tali leleia e Esau o Iakopo, o le fa'ailoga o lona tali leleia e le

Atua. O le autū fo'i lea o ta ola ofo ma meaalofa ofo mo uso, i le talalelei e ala i lenei Ekalesia, e pei ona i ai le fa'amoemoe o a ta faigātaulaga i lenei vaitau. O ta ola ofo mo le Atua auā na silisili le taulaga na saunia e le Atua mo lo tatou fa'aolataga. Lea e i ai tala o lona vaiaso pa'ia, i le soifua na ofo mai o Iesu. O i'ina e fai ai le ola o isi autū ai le talalelei a le Ali'i, ma autū o ta ola ofo. O le talalelei o le ola lavea'iina e ala i mea sili ofo atu, ua lē na o na fai ai isi ma uso, a o a tatou uo e pei o upu a Iesu (Ioane 15:12-17).

### 4. So'otaga fa'auso e autū i le so'otaga fa'auo (*The brotherly and sisterly relations root in being friends*):

Iā Iesu (Ioane 15:12-27), so'o se so'otaga fa'auso i le fai ai ma so'o fa'aola, e fa'avae i le alofa. Ua lē o ni us oi le so'otaga tautoto i aiga e tutupu a'e ai, a o tagata soso'o fa'atasi i le alofa atu ma alofa mai. O uso ua fealofani. O le fealofani fa'auso ua soso'o fa'auo, e pei ona fai ane Ioane (f.13), "E lē sili lava le alofa o se tasi i lenei alofa, ia tu'uina atu e se tasi lona ola mo ana uo". O le ola tu'uina atu e autū ai le so'otaga fa'auo; a o le tino fo'i lea o le alofa [*loving one another is the embodiment of love*]. O i'ina fo'i i le alofa ua tino, ia autū ai mafutaga fa'auso. O lona uiga, a lē maua le so'otaga fa'auo, e leai se uiga o so'otaga fa'auso. So'otaga fa'auso i le fai ai o isi ma uo, e lē toe fai ai le tagata ma auauna fa'apologaina, e pei o matai pulea le ola o auauna i li'o fa'alutaia ma atunu'u i Sasa'e-tutotonu, ma le fa'aleiloga ai fo'i o le fa'apologaina e le 'au malolosi i lo tatou atunu'u o nai tagata vaivai. Na fai ane ai Iesu (m.15 f.15a), "Ou te lē toe ta'ua outou o auauna, auā e lē iloa e le auauna mea e faia e lona ali'i, a ua ou ta'ua outou o uo, auā ua ou fa'ailoa atu ia te outou mea uma na ou fa'alogo ai i lo'u Tamā".

O mea fa'ailoa [*make everything known*], o le atoa lea o so'otaga fa'auo. E leai ni mea natia, e pei o tagata e ese upu feso'ota'i ai, ese lagona leaga natia i le loto. Pogai lea e fiu ai e saili le pogai e mavaevae ai aiga, nu'u, ae maise Ekalesia; a lē o le lē fia soso'o fa'auo, ua soso'o na'o upu ae mamao loto. O upu a se tasi ali'i atamai, e sili upu sasa'o e tigā i le fa'alogo, ae tupu mai le loto mama, nai lo upu suamalie ufiufi ai le loto tetē'e faufau leaga. O le soso'o atu la fa'auo, i mafutaga fa'aleaueso, e lē o le malie fa'aletino. O le soso'o fa'auo, e pei ona autū ai ta'utinoga, "Ou te alofa atu i tau o le sololelei ma tau tigā o le ola". O le alofa fo'i e feso'ota'i atu ai matua i fanau, o meaalofa ma o latou tofi mai le Atua. E tausi ma a'oa'o ina ia tutupu i le finagalo o le Atua, ma fa'aauauina ai le fa'asinomaga o aiga mai le Atua.

E fa'apea fo'i i mafutaga i faiganu'u, le mālō, ae maise le Ekalesia, o le auuso e soso'o fa'auo, a e lē o le fa'aaogaina o le ola o le auuso vaivai i faiga lililo e mai-lei ai lelei mo na'o a'u ma lo'u aiga. O le soso'o fa'auo, e fa'asili ai lelei o isi ae maise le au vaivai. O le auuso vaivai ma agaleagaina, o uo na autū ai le ola ofo o Iesu, e pei on ai ai tala o le vaiaso pa'ia, i le Ali'i fa'apua-puagāina, maliu, ma toe soifua mai le oti. O le so'otaga fa'auo fo'i fa'alesu, e ta'ele i le talia o lo tā fa'atauva'a ma fa'amaulalo atu, e pei ona fai e Iakopo na ifo to'ele i lona uso o Esau; ma amata ai le so'otaga fou fa'ale-auuso feso'ota'i i le alofa fa'auo. E lē taofiofi ai i so ta sili i so'otaga auā e lē o le sili le atoa o le avea ma uo a Iesu, a o le tutusa i le fai ai o le tasi ma uo a le isi. O le auuso i le so'otaga fa'auo e tautua fa'auouo, u'uu'ulima, ma fefa'asoa'a'i, i le fai ma uo a Iesu. O mafutaga fa'auo, e sailia le olioli loloto mai le ola mafatia, auā na manu'anu'a lo tatou Ali'i ina tatou maua le olioli i le ola i le taimi nei, ma ia maua atili ai lava e o'o i le fa'avavau, AMENE.

\*\*\*\*\*

*Fa'auau mai le itulau 1*

**Osi Feagaiga EFKAS Lupe o le Fa'aolataga ma Vaimoso & Lilly Pasia FS...**

...Nanai na fai ma sui o aiga aua tulaga masani o le mea na moe miti i ai aiga aua lupe fa'alele a aiga o lea ua momoli atu o le faifeau ma le faletua i lo la'ua faiva alofi lima o le tausiga o le galuega e pei ona filifilia i la'ua e le ekalesia Lupe o le Fa'aolataga. O le tofa ia Auuapaau Mavaega o le Taitaifono o le ekalesia na fai ma sui o le ekalesia aua le talia o aiga ma le fa'amoemoe o le momoli mai o le faifeau ma le faletua.

O le Aso Toona'i, Mati 25, 2023 i le itula e sefulu i le taeo na feiloai ai le afaigaluega a le Pulega ma le Matagaluega aua se malu taeo na saunia e le ekalesia. O le 11:45am na amata ai le sauniga i le malumalu, sa ta'ita'i e le Susuga i le Faifeau Toeaina o le Pulega Alaska i Matu, Edwin Galeai FT.

O le afioga i le Tiakono Toeaina o le Matagaluega, Vaiao Taliulu TT, sa fai ma sui o le Ekalesia e faia le molimau e tusa ai o lo latou filifilia o le latou faifeau. Sa ta'ua e Vaiao, o Vaimoso ma Lilly o lupe fa'alele foi a le ekalesia ma o i la'ua o latou sui na aotauina uma i la'ua ma ua i'u mai i le kolisi fa'afai-feau i Kanana Fou ma o lea ua tasi ai le ekalesia e avea ma o latou faifeau. O le molimau a le faifeau ia Vaimoso Pasia o i la'ua sa a'e laua i le tausaga 2010, ma sa a'e ai le Faletua i le tausaga 2011. Na aotauina i le kolisi ma fa'amanuia o la'ua taumafai i le tausaga 2014, na i'u ai le taumafai a Vaimoso i le fa'aailoga o le

BD; a o le tausaga 2015 na i'u ai Lilly. O le tausaga 2016 na fa'auuina ai le tofi faifeau o Vaimoso ina sa maua lona avanoa e galue ai mo le lua tausaga i le Ofisa Aoaoga Kerisiano EFKAS; ma, ina ua penisione le tama Toeaina Eneli Kalifa ma le faletua, o i la'ua sa vaaia le galuega Lupe o le Fa'aolataga. Sa ta'ua e le faifeau ia Vaimoso le iai o le iite i lagona aua e le'i mamao tulaga ia a ua la maua tala ua fonu le ekalesia. Ma, o le aso 11 o Setema, 2022, na fa'aailoga atu ai e le Ta'ita'ifono ia Auuapa'au Mavaega, o la'ua ua filifilia e le Ekalesia e fai ma ana Feagaiga taulagi. Ua manatua ai e le faifeau o Vaimoso fautuaga a le peresetene o le kolisi fa'afai-feau i Kanana Fou "o le a lava le valaau e muamua mai ia outou taliaina." Ma o lena sa fa'apea ona fai. Ua la'ua taliaina le valaau a le ekalesia Lupe o le Fa'aolataga e avea ma o latou faifeau.

O le au failotu o le sauniga o le afaigaluega a le Pulega Alaska i Matu ma le Matagaluega Alaska: o le Ta'ita'i o le sauniga o le Susuga i le Toeaina Edwin Galeai FT; o le faitauina o le Tusi Paia o le Susuga i le Faifeau ia Fa'alefu Savusa FS; o le Tatalo na saunia lea e le Susuga i le Feagaiga ia Stephen Taulealea FS; o le Lauga na saunia e le Susuga i le Feagaiga ia Iotamo Falealili FS. O le Tatalo Fa'amanuia mo le faifeau ma le faletua na saunia e le Susuga i le Toeaina ia Niu-tunu Faiupu FT. O le aao o le fa'atalofa ina ua uma le tatalo fa'amanuia o le Susuga i le Toeaina ia Faiupu ma le Tiakono Toeaina ia Vaiao Taliulu TT, o sui o le Matagaluega Alaska; o le Susuga i le Toeaina ia Edwin Galeai FT; o le Susuga i le Toeaina Malolo ia Kalifa ma le afaigaluega o le Pulega Alaska i Matu na latou fa'atalofa i le faifeau ma le faletua; atoa ai le mamalu o le ekalesia Lupe o le Fa'aolataga ma tama ma tina na fai ma sui o aiga ma isi.

O le feau fa'amalosi o le lauga mo le galuega fou, o le ola valaauina e faia ma le fa'alagolago i le Agaga e maua ai le loto o le fa'amalosi ma le onosa'i. Ia auauna i le Atua ma le loto maulalo ma le alofa ma le ava i le Atua ma tagata. Tima'i foi le Susuga i le Toeaina ia Galeai (Mataio 10:42), "Ai se avane foi tau lava o se ipu vai malulu e inu ai se tasi o i latou nei e fa'atauva... Ou te fai atu ia te outou, e le maumau lona tau." O le galuega e tigaina lona ala ma faigata ona magaala. Peita'i, e le maumau se auaunaga ua e faia mo Iesu. Ina ua mae'a le sauniga, sa alo le Ekalesia mo taumafataga ma fa'aaloaloga mo le afaigaluega ma le 'au valaaulia e pei ona masani ai. Ia manuia le galuega fou Vaimoso ma Lilly.

Saunia:  
**Stephen Taulealea FS**  
 Failautusi, Pulega Alaska i Matu



## Toe Fa'afou Fale Mautotogi a le Ekalesia i Fagalele

O Aperila 14, 2023, na fa'apaia ai le galuega i le toe fa'afouina o fale mautotogi a le Ekalesia o i le fanua a le Ekalesia i Fagalele, Leone. O le tau atoa o le galuega na toe fa'afou uma ai fale mautotogi e 5, e \$277,000.00. O le alaga tupe mai le Malo o Amerika Samoa i le vaega tupe o le *American Rescue Plan Act (ARPA)* e fa'apitoa mo Ekalesia ma Fa'alapotopotoga lē su'e tupe, na maua mai ai le \$250,000.00 e fa'atino ai lenei galuega.

O le sauniga mo le fa'apaia o le galuega sa ta'ita'iina e le Afioga i le Sui Ta'ita'ifono, le Susuga i le Toeaina ia Fa'aeteete Saifoloi FT. O e na valaaulia e molimauina lenei fa'amoemoe, e aofia ai le Fa'atonu o le *Criminal Justice*, o le faletua ia Mariana Faii - o le Matagaluega lea a le Malo sa feagai ma le fa'asoasoa ina o le alaga tupe mai le ARPA sa fa'atino ai le galuega; ma le Agaiotupu, le Susuga i le A'oa'o ia Manutafea Fano, le ta'ita'i o le LDJ Builders. Sa valaaulia foi le Susuga i le Feagaiga ia Iese Fa'avaoga FS o le EFKAS Leone, le Afioga i le Faipule ia Fiu Saelua TK, Ta'ita'ifono EFKAS Leone, ma le Afioga ia Ulua'ipoualaloifi Laumoli TK, o le Failautusi EFKAS Leone; e fai ma sui o le afoaga o Leone e molimau i le galuega. Sa 'auai foi le Afioga i le Ta'ita'ifono o le Fonotele, le Susuga i le Toeaina ia Leatulagi Fa'alevao FT, le Afioga i le Ta'ita'ifono o le Komiti a le 'Au Toeaina, le Susuga i le Toeaina ia Falelua Lafitaga FT.

O le Failautusi Aoao, Nafatali Falealii FS, sa saunoa i le Tala o le Galuega, a o le Fa'atonu ia Mariana Faii sa tuu i ai le fa'aaloalo e ootiina le lipine. Ina ua mae'a ona ooti le lipine, ona fa'asolo lea o le 'au valaaulia e asiasi fale ta'itasi. Ina ua mae'a le asiasiga, ona alo lea o le Komiti o Feau Eseese i tulaga o fa'aloaloga e pei ona masani ai mo le 'au valaaulia, fa'atasi ai ma le taumafataga. O le Susuga i le Toeaina ia Falelua Lafitaga FT na faia le saunoaga fa'aiu ma le tatalo fa'amanuia.

## Fonotaga a le Oceania Biblical Studies Association (OBSA) i Kanana Fou

O Aperila 5-7, 2023, na talimalo ai le Kolisi Fa'afaifeau i Kanana Fou i le fonotaga a le *Oceania Biblical Studies Association (OBSA)*. O lenei asosi ua tu'ufaa-tasia ai le 'au popoto o le Pasefika ua latou fa'atauaina su'esu'ega i le Tusi Paia mai le itulagi fa'a-Pasefika. O ona totino e aofia ai sui o Kolisi Fa'afaifeau i Samoa, o Amerika Samoa, Toga, Fiti, Niu Sila, Ausetalia, ma isi atumotu o le Pasefika. O le fa'amoemoe tupito o le asosi: ina ia lagona le siufofoga o le Pasefika i totonu o fa'alagamaea o su'esu'ega o le Tusi Paia i le lalolagi.

O le autu o le fonotaga a le OBSA sa faia i Kanana Fou, o le va'ava'ai i auala eseese e mafai ai e le Tusi Paia ona fesoasoani i tagata o loo feagai ma faigata ona o fa'ama'i o le tino, le mafaufau, ma le agaga. O ia auala e taula'i uma i le va'ai fa'a-itulagi o le Pasefika i le Tusi Paia. Sa mata'ina le fa'alogologo i pepa ma fa'asoa a le 'au faipepa. O le 'au faipepa sa 'auai e aofia ai nisi o Faifeau Faiaoga mai le Kolisi Fa'afaifeau i Malua, Kolisi Fa'afaifeau Sia'atoutai i Toga, Kolisi Fa'afaifeau i Piula, Kolisi Fa'afaifeau i Kanana Fou, Kolisi Fa'afaifeau o le Pasefika i Fiti, fa'atasi ai ma le Iunivesite o le Katoliko i Ausetalia.

Na valaaulia le 'aufaigaluega o le EFKAS ma le Lotu Katoliko ma le Metotisi e 'auai e fa'alogologo ma fa'asoa i mataupu o le fonotaga. To'atele le 'Au Toeaina ma le 'aufaigaluega tausi 'aulotu sa 'auai. E i ai foi nisi o le 'aufaigaluega i atunuu e mamao sa 'auai mai i luga o upega tafailagi. Sa taliga fia fa'alogo le mamalu o e sa 'auai i mataupu ma fa'asoa a le 'au faipepa. O le to'atele o le 'aufaigaluega e fou lo latou fa'alogo le va'ai fa'a-itulagi o le Pasefika lea sa fa'aaoga e le 'au faipepa e 'auiliili ma su'esu'e ai le Tusi Paia.

E i ai pepa sa fa'asoa mai i le va'ai fa'a-fofo Samoa poo le fa'ataulasea i nisi o fa'amalologa sa faia e Iesu e pei ona molimau ai le 'au Faievagelia. E i ai le pepa sa fa'aaogaina le fa'aupuga, "Teu le Va," e 'auiliili ai le tala i le fa'amaloloina e Iesu o Lepela e Sefulu i le Evagelia o Luka. O le isi fa'aupuga o le atunuu, "E fofu e le alamea le alamea," sa fa'aaoga e auiliili ai le a'oa'oga a Iesu e uiga i le agasala i totonu o le Ekalesia e pei ona fa'amaumauina i le Evagelia o Mataio 18:15-17.

E le fesiligia le tamaoaiga fa'aleagaga sa fa'asoa mai ai le 'au fai pepa i lenei fonotaga a le OBSA. O se fa'amanuiga tele lea mo le 'aufaigaluega sa 'auai ma fa'alogologo. O le aso mulimuli o le fonotaga na faia ai le sauniga lotu fa'amavae i le malumalu 'Ua Taunuu', ma fa'atofa ai ma le 'au usufono sa malaga mai.

**Fa'afiafia le EFKAS i le Sisiga Fu'a 123 Tausaga a le Malo o Amerika Samoa**



Na fa'afiafia le EFKAS i le Fu'a a Amerika Samoa sa fa'amanatuina i le aso 17 o Aperila 2023. O Ianuari 2023 na mua'i fa'ailo mai ai le finagalo a le Afioga i le Kovana Sili, e lafo fa'afiafiaga o le Fu'a e tapena mai ai Ekalesia tetele o le atunuu, e aofia ai le EFKAS, o le Ekalesia Katoliko Pago Pago, ma le Metotisi Samoa Sinoti a Tutuila, e saunia pese ma siva mo le Fu'a.

Ina ua mae'a le fonotaga a le Komiti a le 'Au Toeaina sa faia i Hawaii ia Ianuari 2023, na toe fono ai le 'Au Toeaina i Samoa e talanoaina le valaaulia a le Malo mo le Fu'a. I le tuana'i, sa i ai le valaaulia a le Ekalesia mo le Fu'a sa tuuina atu i le Aoga Maualuga ma le Kolisi Fa'afaifeau i Kanana Fou. O le isi tausaga sa tuuina atu i le Pulega a Itu'au e fai ma sui o le Ekalesia. Peita'i, o le tausaga nei, na finagalo 'autasi ai le 'Au Toeaina i Samoa ina ia faitaulia le Ekalesia atoa i Tutuila ma Manu'a i fa'afiafiaga o le Fu'a. Talu ai o le EFKAS o le Ekalesia e sili ona to'atele ona totino nai lo se isi lava Ekalesia i Tutuila ma Manu'a, e tataua ona foi ona atagia le to'atele lea i le aofa'i o tagata e fa'afiafia i le Fu'a. O se maasiasi tele le fai ane o le Fu'a, ae to'atele ai le 'au fa'afiafia o le Katoliko poo le Metotisi nai lo le EFKAS.

Ina ia faigofie le a'oina o le pese ma le siva i tagata o le Ekalesia, na fa'atulaga ai e le 'Au Toeaina le vaevaega e fa'apea: o le Matagaluega Sasa'e e feagai ma le pese ma a'o muamua ai latou i le pese, a o le Matagaluega Sisifo e feagai ma le siva ma a'o muamua ai latou i le siva. A mae'a ona a'o le Matagaluega Sasa'e i le pese ma a'o le Matagaluega Sisifo i le siva, ona omai fa'atasi lea i Kanana Fou e tuufa'atasi ai le pese ma le siva, ma a'o fa'atasi ai le Matagaluega Tutotonu ma le Matagaluega Manu'atele.

O le Susuga i le Faifeau ia Setefano Pouli FS sa tusia ma fatuina le pese. O le Susuga i le Feagaiga ia Faletoi Aofia FS ma le atalii ia Waiana sa feagai ma le taina o le piano, fa'atasi ai ma le alii o Swains sa taina le pake. O le masina o Fepuari na amata ai ona a'o le

Matagaluega Sasa'e i le pese, sa fa'aaogaina ai le Hall o le Ekalesia i Amouli ma Faga'itua e fai ai aoga. O le vaiaso muamua o Mati na siitia mai ai a'oga pese i le fale-taalo a le Aoga Tulaga Muamua o Matafao i Fagaalu, na a'o fa'atasi ai le Matagaluega Sasa'e ma le Matagaluega Tutotonu.

O le Laulau o le Mafutaga Aoao a Tupulaga Talavou na lafo i ai e Toeaina o le Matagaluega Sisifo le a'oina o le siva, lea sa ta'ita'i e le Peresetene o le Mafutaga, Salima Eucharist Reupena, ma le Failautusi, Laloifi Saelua. O isi foi Tupulaga mai le Ekalesia i Leone, Malaoloa, Vailoa, ma Pavaiai sa fesoasoani i le a'oina o le siva, ma le taina o le pake ma le piano. O le masina foi o Fepuari sa amata ai a'oga siva a le Matagaluega Sisifo, na fa'aaoga ai le fale-taalo a le Aoga Maualuga i Leone.

O le vaiaso lona lua o Mati na tu'ufa'atasia ai le pese ma le siva i le fale-taalo Taeaoafua o Tupulaga i Kanana Fou. O se vaaiga uiga ese le tumutumu mai o le Ekalesia ina ua omai fa'atasi le Matagaluega Sasae, Tutotonu, Sisifo, ma le Manu'atele. E silia ma le 800 tagata o le Ekalesia sa 'auai, e aofia ai Toeaina ma le aufaigaluega, o A'oa'o ma Tiakono, o Tama ma Tina matutua, aemaise le tupulaga ma fanau. Na 'auai foi le Afioga i le Ta'ita'ifono a Tama o le Ekalesia, le Susuga i le Toeaina ia Falelua Lafitaga ma le Faletua ia Ieta, malaga mamao mai i Hawaii e opogi le fa'amoemoe o le Ekalesia.

O le Failautusi Aoao o le Ekalesia, Nafatali Falealii FS, sa fai ma fofoga o le Ekalesia i lea aso. A o le Afioga i le Ta'ita'ifono o le Fonotele, Susuga i le Toeaina ia Leatulagi Fa'alevao, sa tualugaina le fa'amoemoe. E \$69,000.00 le seleni a le Ekalesia na maua i le Fu'a, ma ua finagalo ai le Ta'ita'ifono o le Fonotele ma le Ta'ita'ifono a Tama o le Ekalesia, e tufa le seleni mo le Ekalesia sa gapatia ma fatuatia i le fa'amoemoe o le Fu'a. Fa'afetai EFKAS i lou loto Ekalesia. Fa'afetai foi le EFKAS i atunuu e mamao le tatalo ma le tapua'i.

## Lisi o le 'Aufaigaluega Agavaa mo le Galuega Tausi 'Aulotu

O le lisi leni o le 'aufaigaluega i Faifeau ma A'oa'o Kanana Fou o loo avanoa ma agavaa mo le galuega tausii 'aulotu. Ua saunia leni lisi ona o le finagalo o le Fono Tele (FT:16-26), e fesoasoani ai i 'aulotu o loo tau saili ni o latou feagaiga. O suafa ia, e le gata o le 'aufaigaluega o loo galulue nei mo le Ekalesia Aoa o Kanana Fou ma le Ofisa Tutotonu, a o i latou foi o loo galulue fa'amaoni i tua i 'aulotu ma Pulega, e pei ona tu'uina mai e Failautusi o Pulega. Afai e i ai se faigaluega agavaa e le o i ai lona suafa i leni lisi, ia fa'afesootai mai le Ofisa a le Failautusi Aoa o le imeli: gensec@efkasonline.org, e fa'alauiloa ai lou suafa i le taimi e toe lolomia ai le Lamepa.

### **Seminare Fa'afaifeau i Kanana Fou:**

Dr. Moreli Niuatoa FF, *Peresetene*  
Dr. Simi Mauga FF, *Sui Peresetene*  
Sasa Sotoa FS, *Teutupe Seminare*  
(*fa'amaonia e le 'Au Toeaina*)

### **Ofisa o le Failautusi**

Fuli Taveuveu AKF, *Sui Failautusi*

### **Ofisa o A'oa'oga Kerisiano:**

Setefano P. Lefale FS, *Fa'atonu*  
Sega Ifopo FS  
Vili Polikapo FS  
Penani Lefaoseu AKF  
Simeona Ape AKF

### **Lamepa:**

Edward Semaia FS, *Fa'atonu*  
Vagana K. Saili AKF

### **Pulega Fale-Ta'u:**

Ioane Ioane FS (Fitiuta)

### **Pulega Sua:**

Ioane Peleti FS (Fagaitua)  
Simeona Ape AKF (Laulii)  
Waiana Tanielu FS (Masausi)  
King Talamoni FS (Amaua)

### **Pulega Sa'ole:**

Setefano P. Lefale FS (Auasi)  
Vili Polikapo FS (Amouli)  
Edward Semaia FS (Aunuu)  
Siavao Iese FS (Alofau)

### **Pulega Fagalao:**

Tumau Petaia FS (Fagaalu)

### **Pulega Itu'au**

Tavita Mailoto FS (Ma'ama'a)  
Al Luavasa Tunupopo FS (Fagasa)

### **Pulega Tualatai:**

Sega Ifopo FS (Vailoatai)  
Uaea Satele FS (Vailoatai)  
Daru Ulutu FS (Malaeloa)  
Sinaka Ulutu FS (Malaeloa)  
Amaamalele Tofaeono FS (Taputimu)  
Peleli Tanuvasa FS (Taputimu)

### **Pulega Alataua:**

Rossetti Fa'amausili FS (Nua Seetaga)  
Tasele Tuigamala FS (Leone)  
Soosoo Tuiolomotu FS (Poloa)  
Fetuaio Mua FS (Leone)  
Fulifuli Taveuveu AKF (Nua Seetaga)

### **Pulega Tualauta:**

Kirifi Muao FS (Pavaiai)  
Vagana K. Saili AKF (Aasu)  
Penani Lefaoseu AKF (Faleniu)

### **Pulega San Francisco:**

Moegagogo Tamasese FS  
Eliu Eseroma FS (Daly City)  
Ketesemane V. Tagalao FS (Sacramento)  
Safue Ulufalelupe AKF (Sacramento)

### **Pulega Santa Clara:**

Vai Malaulu FS (Tafatolu)

### **Pulega LA Matu:**

Samuelu Tialavea FS (FOLA)  
Emosi Liaina FS (Ola Fou)  
Sugalua Filivaa AKF (Ola Fou)

### **Pulega LA Saute:**

Timoteo Young FS (Etena Fou)  
Mose Mose FS (USC)

### **Pulega Alaska i Matu:**

Fa'alefu Savusa FS (Faavae Fou)

### **Pulega Alaska i Saute:**

Tomasi Foilefutu AKF (Feagaiga Fou)

### **Pulega Ausetalia:**

Oto Tumanu FS (Alofisa o le Atua)

## Lisi o 'Aulotu Avanoa

O nisi ia o 'aulotu o le EFKAS ua avanoa i le taimi na lolomi ai leni Lamepa,  
o le a ogā ai leni lisi e saili ai so latou faifeau:

- EFKAS Olosega
- EFKAS Tula
- EFKAS Taputimu
- EFKAS Kanana Fou, Sydney



**EKALESIA FAAPOTOPOTOGA KERISIANO I AMERIKA SAMOA**  
1 Kanafofou Fou St, P.O. Box 1537, Pago Pago, Amerika Samoa 96799  
+(684) 699-9810 <https://efkasonline.org>